

四讚二頌同卷

聖觀自在菩薩功德讚

讚觀世音菩薩頌

佛說聖觀自在菩薩梵讚

聖多羅菩薩梵讚

事師法五十頌

犍椎梵讚

言七

大明太宗文皇帝御製觀音讚

大聖自在觀世音 百千萬億應無盡

神通無礙無所住 大慈大悲愍眾生

六根互用智慧深 聞思修入三摩地

濟度隨機而顯現 有如一月印千江

一江有月一江明 明照惟一本無二

世人但以眼觀色 菩薩乃以目觀聲

彼惟有所窒於觀 是故不能神妙用

大士有目冥不覩 耳鼻舌身意亦然

能以此觀如是觀 終不顛倒成妄想

熏習見聞既寂滅	亦復無是妙色身
有能洞此十方空	同證圓通三昧海
身心無量徧沙界	不動本際應所求
譬如萬卉遇春風	種種萌芽自生發
敷榮暢達各長茂	或為枝葉結果成
酸鹹甜苦及青紅	一切皆令如願足
現前是法不思議	不著諸相乃為真
一毛徧量法界空	洗淨五濁諸熱惱
摧裂障山悉消蕩	無邊苦趣總脫離
娑婆世界為樂城	妙相恒沙俱顯露

以太虛空為體相	寶髻攢聚五須彌
以四大海為口門	睭日月光為兩目
森羅萬像為瓔珞	發無上願具辯才
引施十四無畏功	妙顯三十二身應
普為衆生之瞻仰	廣運諸佛慈悲心
身與衆生為一身	隨感而應觸處動
爾以正見能見我	我以無見觀自在
如鏡照鏡谷答響	含攝朗徹皆自然
證此三昧即超凡	一法具足一切佛
開啓慈悲功德藏	溥示善功方便門

賢劫未來諸衆生 咸證菩提登正覺

大明太宗文皇帝御製大悲觀世音菩薩讚

觀音證悟妙圓通 入流亡所自聞中

由聞入覺所覺空 清淨寶覺成圓融

三昧慈力與佛同 妙力自在成就功

瓔珞莊嚴百寶瓏 補陀巖現滿月容

摩尼寶目蓮華瞳 頻伽瓶水海波溶

楊枝葉葉生春風 超越出世妙無窮

三十二應隨所從 四種無畏功德崇

稱揚名號猶擊鐘 感應有如聲度壙

無有所礙咸達聰 援拯沉溺開惑蒙

言七

大悲慈力允敬恭 恒河沙數垂範幪

隨順方便各有庸 周徧法界福攸隆

動靜二相了無蹤 妙明寂靜顯性宗

慧光普燭七寶紅

永樂九年十二月十五日

聖觀自在菩薩功德讚

宋四天主藏朝奉大夫試鴻臚卿傳法大師施護奉 詔譯

歸命最勝觀自在 滿月妙相蓮華生
 能以無畏施有情 我今稱讚彼功德
 一切善法悉具足 頂戴諸佛大智冠

福慧莊嚴最上尊 是故歸命蓮華手
 兩頰圓滿紅白色 鼻相脩直妙端嚴
 齒如珂雪密復齊 四牙平正而具足
 梵音清響復深妙 一切聞者生愛心
 凡所宣說眾語言 柔和善順而甘美
 常以大悲方便力 救度一切苦眾生
 自利利他眾導師 是故歸命蓮華手
 雙眉同彼初生月 身相猶如真紫金
 眾寶為髮以莊嚴 一切見者無厭足
 敷鹿皮衣而為座 最上自在眾中尊

身諸相分悉周圓	是故歸命蓮華手
上妙細氎為絡腋	摩尼珠寶作耳環
世出世寶所莊嚴	最上自在最尊勝
諸善功德皆滿足	一切世間大法主
能開種種方便門	是故歸命蓮華手
罪業衆生微塵數	無量劫來處輪迴
菩薩常生方便心	化度悉令歸智聚
放慈悲光照一切	以最上法施衆生
普令有情證菩提	是故歸命蓮華手
所有阿鼻大地獄	菩薩慈悲往現身

破壞彼趣悉無餘	閻摩獄卒生驚怖
彼諸業報衆生類	咸皆離苦罪消除
惡趣能以智火焚	是故歸命蓮華手
具足悲智行願力	欲色界中皆現身
於法自在利群生	閻摩眷屬悉歡喜
破壞一切罪業境	令諸苦惱不復生
有情離苦得清涼	是故歸命蓮華手
我今稱讚大聖者	最上色相無等倫
無礙自在三界尊	普施衆生無所畏
度脫有情出苦海	斷彼三毒煩惱根

咸令得住安樂中	是故歸命蓮華手
所有一切餓鬼眾	針咽大腹及是毛
如是等類數甚多	晝夜受彼飢渴苦
由彼飢渴火所逼	互相吞噉苦惱生
菩薩悲願力所持	往彼現身而救濟
先化種種美飲食 <small>言七</small>	各各令飽益身肌 <small>五</small>
復為宣說正法門	一切得離諸苦惱
菩薩悲智方便力	能入一切趣類中
利行同事攝有情	是故歸命蓮華手
身有大摩尼珠寶	常出淨妙眾光明

普照世間諸暗暝	映蔽日月而不現
所有夜叉羅刹等	蒙光照者悉歸依
觀眾生心令斷疑	是故歸命蓮華手
大力阿修羅王眾	闔諍勇猛而難調
菩薩亦現彼趣中	方便說法而化度
彼聞法已斷疑惑	各各生於慈善心
能施最上妙法門	是故歸命蓮華手
菩薩曾遊諸天界	入一妙環天子宮
隨順方便開化門	彼天悉無諍所施
是時天子生苦惱	菩薩即為現珍財

令彼天子滿施心	是故歸命蓮華手
所有一切貪欲者	常為煩惱火所燒
得見菩薩善威容	即能迴心思正法
世間貪瞋癡盛者	恭敬頂禮大聖尊
三毒煩惱獲銷除	是故歸命蓮華手
衆生界分無邊際	蠅蟲螻蟻數無窮
菩薩亦以慈悲心	處處方便而化度
世間或時值飢饉	即變所食濟群生
咸令息彼飢渴心	是故歸命蓮華手
若見衆生處大海	船筏破壞欲漂沉

菩薩慈悲現馬身	令其攀附而得渡
衆生乘船在大海	菩薩隨意使其風
若順若逆濟衆生	咸令遠離諸怖畏
菩薩已離三界苦	圓滿三摩地法門
復能攝化諸有情	數等虛空無邊際
菩薩已離種種怖	所謂羅刹諸部多
必舍左及拏吉泥	邪迷一切惡鬼衆
大水大火并盜賊	虎狼蟲獸及刀兵
疾病毒藥與邪明	及至王刑禁縛等
菩薩自得遠離已	而復為彼諸衆生

自利利他大導師	最上大悲無畏者
菩薩已具諸梵行	如白月分照世間
人天稱讚大聖尊	是為最上真梵行
菩薩常住三摩地	無邊功德為所依
隨順方便現所居	補陀落山為住止
其山高廣復殊妙	種種珍寶以莊嚴
彼有寶樹數甚多	低羅迦及瞻波等
有諸異鳥止其上	常出清淨妙好音
如是莊嚴聖所居	禮敬瞻仰而獲福
俱尾囉并罽嚩乃	及彼閻摩等三天

乾闥婆王修羅王	夜叉王及諸龍王
乃至部多等諸類	若天若神一切王
晝夜各生恭敬心	歸依稱讚真聖者
彼等如是稱讚已	一切所欲皆隨心
大富快樂壽命長	勇猛精進具威德
息除無量諸苦惱	夢中怖畏亦不生
乃至壽命欲終時	菩薩現身而安慰
聖觀自在功德海	無量無邊無有窮
假以百千劫中	稱揚讚歎不能盡
聖觀自在菩薩功德讚	